



L'antier president dal cussegl grond Vitus Dermont cun la deputada Cornelia Märchy.



Da buna luna: Il dus deputads da la pcd Maurus Tomaschett e René Epp (da san.).



Ina runda illustra: deputada Valérie Accola Favre, Walter Schlegel, cumandant da la polizia chantunala, e ses nov schef, cusseglier guvernativ Peter Peyer (da san.).



Da la Val Alvra la deputada Gaby Ulber ed il deputà Reto Cramerer.

FOTOS G. N. STGIER



Nicoletta Noi-Togni (a san.), la pli veglia deputada cun sia nezza Carolina Togni.



Cussegliera guvernativa Barbara Janom Steiner (a san.) fa in viva cun Tina Gartmann-Albin, la nova presidenta dal cussegl grond.

Per ina giada na tenor protocol

Cuira: Festa per la nova presidenta dal cussegl grond

DA GION NUTEGN STGIER / ANR

■ **Pleds, bler umor, musica e schizont chant, bler e bun vin ed in gentar en cuminanza. Quai è stada la festa en onur da Tina Gartmann-Albin, ella che stat per in onn a la testa dal parlament chantunal.** La sessiun d'avust dal cussegl grond, quella va adina a fin la sonda e quai cun la festa per il nov president ubain la nova presidenta dal parlament chantunal. Quest onn ha quella gi lieu a Cuira cun esser *Tina Gartmann-Albin* la nova presidenta dal cussegl grond, ella ch'è da chasa en la chapitala grischuna. En l'istorgia dal parlament grischun è ella la 6avla dunna che stat per in onn al timun da quel. En ses onn d'uffizi vul la dunna da la ps cunzunt er ir or en las regiuns, sentir il puls da la glieud da la periferia ed er esser averta per lur giavischs. «Il di dad oz, quel vegn jau segir mai ad emblidar», ha ditg Gartmann-Albin sonda en ses pled a la fin da la festa ch'ha cuzà prest set uras.

Pauca seriusadad

In dals puncts culminants tar las festas per il nov president dal cussegl grond èn adina ils pleds dals schefs da fracziun da las partidas. Quel di na vegn cunzunt betg sa tegni als princips protocollars e cunzunt nizzegiada la chaschun da dar als adversaris politics ina morsa ubain ina piztgada en furma plitost umoristica. A pled vegn dentant er il president da la regenza ed er per quel vala quel di il motto: Legria enstagl dir insatge en tutta seriusadad.

Bunamain schumellins

Uschia ha er *Mario Cavigelli*, l'actual president da la regenza, fatg per exempel ina

bilantscha da ses cumbat electoral. Cun el avair ina cumparsa sco ses collega da partida e nov cusseglier guvernativ *Marcus Caduff* haja il suveran savens fatg ina confusiun cun el e cun Caduff, ha ditg Cavigelli. Avess il Lumnezian na colorà ses chavels avess quai dà anc bler pli grondas confusiuns. Caduff saja er girà tras l'entir chantun ed empermess sviaments per mintga vischnanca. Suenter hajan alur blers ditg: Cavigelli ha empermess in'untgida per noss lieu...!

Pauper Jon Domenic Parolini

Vera Stiffler, la scheffa da fracziun da la pld, ha ditg che ses collega da partida *Michael Pfäffli* presideschia bain l'uschenumnada «PUK» en connex cun il scandal da cartel da construcziun en l'Engiadina Bassa e tuttina ha Stiffler fatg ina cumparaziun per la «PUK». Quella sa laschia cumparegliar cun ina «Psichiatri-sche Universitäts Klinik». Ella chape-schia er betg tut ils virivaris enturn cusseglier guvernativ *Jon Domenic Parolini*. In che na fetschia nagut saja segir innocent e sappia er strusch far in sbagl.

Plaz per ina roda da vent

Insaco saja stà bun da na far in til da festa tras Cuira en connex cun la festività da Tina Gartmann-Albin, ha ditg *Remo Cavegn*, il nov schef da fracziun da la pcd. Gist per cusseglier guvernativ *Jon Domenic Parolini* saja quai stà bun, el che saja adina il davos tar in til...! Avess dentant cusseglier guvernativ *Christian Rathgeb* g'è da decider la ruta dal til avess quella manà da la chasa dal cussegl grond a la Via Loe, sperasvi a trais ospitals, lura vinavant al Rossboden al stan da tir, da là a l'areal da militar. Da là vinavant a la Via

Caserna, cun vista sin tuts ils edificis da militar fin tar il plaz da festa. Quai tut sco adia cun midar Rathgeb ses departament e surpigliar quel da finanzas. Crudà en egl saja ad el er ch'il plaz dasper *Josias Gasser* en la sala dal cussegl grond saja liber, ha ditg Cavegn. Sapientivamain na saja quel betg occupà cun avair Gasser l'intent da montar sin quel plaz sia segunda roda da vent.

Peter Peyer haja experientscha

Gian Michael, il schef da fracziun da la pbd, el ha cunzunt er tematisà ils avantatgs e dischavantatgs dals cussegliaders ch'ils candidats da la regenza hajan g'è. Quel da *Peter Peyer* haja fatg buna lavur. Ad el saja reussi che Peyer haja uss adina en ina giacca, el haja fatg la barba, e da nov portia el er cravatta. *Jan Koch*, il schef da fracziun da la pps, quel ha ditg che tar la pld saja savens realitad ch'il president *Bruno Claus* na sapia strusch quai ch'el fetschia, tar *Vera Stiffler*, la scheffa da fracziun, saja uschia che nagin na sappia quai ch'ella pensia, er tar *Silvio Zuccolini*, il schef da pressa, na sappia nagin quai ch'el scrivia. *Conradin Caviezel*, el che stat al timun da la fracziun da la ps, ha menziunà d'esser cuntent che ses ami da partida Peter Peyer surpiglia il departament da Christian Rathgeb. Almain haja Peyer experientscha quai che pertutgia enonuscher ina praschun... (Peyer è stà refusader dal servetsch militar). Tar *Marcus Caduff* saja bain er succedi sco director dal spital da Glion insatge curius. A l'entschatta da quest onn haja el retschet ina narcosa ed ils 10 da zercladur sa desdà sco cusseglier guvernativ, ha ditg Caviezel cun in surrir.



Il deputà Lorenz Alig (a san.) en discussiun cun Johannes Flury, il president da la Lia Rumantscha.